

DIO TRASKRIPTA PONOVDNE 21. SJEDNICE SKUPŠTINE, ODRŽANE 23.12.2015.
GODINE U KOME JE SADRŽANA RASPRAVA PO TAČCI 2. „NACRT BUDŽETA
ZENIČKO-DOBOJSKOG KANTONA ZA 2016. GODINU“

PREDSJEDAVAJUĆA DRAŽENKA SUBAŠIĆ

Pitam predstavnike Zakonodavno-pravne komisije i Komisije za mlade da li žele obrazložiti stavove komisija sa njihovih sjednica? Riječ ima Damir Jukić.

DAMIR JUKIĆ

Poštovana predsjedateljice, sa dopredsjedateljima, tajnikom, članovi Vlade, kolegice i kolege, mediji, gosti, sve Vas lijepo i srdačno pozdravljam, a svima onima koji očekuju Božićne blagdane želim da ih provedu čestito i blagoslovljeno, pa svima nama želim sretnu i uspješnu 2015.godinu. Komisija za mlade je održala svoju sjednicu na kojoj je razmatrala Nacrt Proračuna Zeničko-dobojskog kantona za 2016.-tu godinu i usvojila 2 zaključka. Komisija za mlade predlaže Vladi Kantona da poveća iznose sredstava na slijedećim pozicijama:

-Tekući transfer za stipendiranje studenata razrez 57, budžetska organizacija 2201 Ministarstvo obrazovanja, sa planiranih 900.000 maraka, povećati na 1.100.000. Svjesni situacije da iznos stipendija u Zeničko-dobojskom kantonu... je među najnižim u Federaciji.

- Tekući transfer za sport, razrez 95, budžetska organizacija 2201 sa planiranih 495.0000 povećati na 555.000, dakle da se planira 555.000 KM, koliko je bilo, evo, i biće izvršenje za 2015.godinu.

-Tekući transfer za kulturne manifestacije, izdavačku djelatnost razrez 96, budžetska organizacija 2201, sa planiranih 45.000 povećati na minimalno 60.000.

Kada je u pitanju transfer za kulturne djelatnosti, samo evo napomena komisije da je 2008. godine taj transfer iznosio 300.000 za kulturu. Slična je situacija sa transferom za omladinske projekte gdje se predlaže povećanje sa planiranih 45.000 na minimalno 60.000, opet radi usporedbe 2008. godine konstantno je padalo do današnjeg dana, taj transfer je iznosio 150.000. Moram ovdje spomenuti i ovaj transfer za sport, 2008. godine iznosio je 1.100.000 KM, a sada imamo u planu 495.000. Hvala lijepo.

PREDSJEDAVAJUĆA DRAŽENKA SUBAŠIĆ

Otvaram raspravu po ovoj tački dnevnog reda, ko želi učestvovati? Gospodin Bečarević.

MUFID BEČAREVIĆ

Poštovana predsjedavajuća, cijenjeni ministri, kolege, dragi gosti sve vas selamim i pozdravljam. Prije evo nešto kažem o Nacrtu Budžeta u ime Kluba A-SDA želim da čestitam svim vjerinicima katoličke vjeroispovijesti Božić. Ovako, na 16. strain, znači vidim da su ovdje izdaci za komisije zastupnike i druge samostalne djelatnosti, znači došlo je do umanjenja blizu 100 hiljada, pozdravljamo to. To smo prošle godine i u amandmanima tražili, znači mislim da treba naći mogućnost da ove troškove da ostanu na ovom nivou. Što se tiče Tekućeg transfera za finansiranje političkih stranaka, kolacija, mislim da i ovdje postoji prostora dovoljno da barem za jedno 100 hiljada umanjimo i ovu stavku. Na 19. strani što se tiče Kantonalne uprave civilne zaštite, mislim da prilikom kreiranja Prijedloga Budžeta treba

uzeti u obzir i ono što sam prekjuče čini mi se diskutovao, vezano je zato što nismo uskladili Zakon o požarstvu i mislim da inspektorat mora postojati. To je prenešena ta nadležnost na Kanton i treba planirati sredstva za taj dio. Što se tiče Ministarstva unutrašnjih poslova u ovoj godini smo u više navrata..., ukazano nam je problem znači nedostatka policijskih službenika. Vidim da je ovdje došlo do neznatnog povećanja obzirom na broj policijskih uprava, mislim da je to nedovoljno i treba razmišljati u tom dijelu o povećanju. Što se tiče sredstava za isplatu nagodbe, po pravosnažnim sudskim presudama, mislim da treba predvidjeti i za ovu godinu obzirom na već presuđene pravosnažne sudske presude koje imamo. Zatim, što se tiče Ministarstva za rad, socijalnu politiku i izbjeglice, ovdje vidim da su umanjena sredstva za naknade za porodijsko odsustvo, novčana pomoć za nezaposlene porodilje, jednokratna pomoć za opremu novorođenog djeteta, pomoć u prehranu djeteta do 6 mjeseci. Mislim da ove stavke, ako ništa barem trebamo zadržati na prošlogodišnjem nivou jer, evo i jedan podatak znači samo Svjetska zdravstvena organizacija predviđa da ćemo do 2050.-te u Bosni i Hercegovini imati negdje između 18 i 20% stanovništva. Mislim da treba ove stavke zadržati barem na prošlogodišnjem nivou. Ovdje što se tiče školstva zamoljen sam vezano za Gimnaziju Visoko, direktor me zamolio, ja sam prošle godine izlagao o neuslovnim uslovima sale gdje se održava fizička ta kultura. Ja sam tražio u tom momentu da se poveća čini mi se za 7 hiljada i rade u dovrani u Visokom. Međutim nije ni to problem, neka rade u neuslovnim uslovima, oni imaju ugovor sa Općinom Visokom koja je vlasnik te sale, sad gdje rade na 15 hiljada na godišnjem nivou. Vidim da je ministarstvo im odobrilo 11 i 900, znači postoji mogućnost da Općina Visoko već za ovu godinu znači tuži Ministarstvo vezano za naknadu preostalog dijela duga. Što se tiče Kantonalne uprave za inspekcijske poslove znači, mislim da ovdje potrebno predvidjeti sredstva za 5 inspekcija. Znači jedno od mojih poslaničkih pitanja je bilo u prethodnom periodu koje nam inspekcije nedostaju, to je urbanistička, zdravstvena, farmaceutska, lovna i čini mi se za zaštitu okoline. Mislim da treba planirati sredstva jer kako će inspektorat raditi ukoliko nema 5 inspekcija. Što se tiče ovog Nacrta znači mi ćemo vjerovatno kao Klub A-SDA amandmanski djelovati i na osnovu toga ćemo znači vidjeti, na osnovu naše današnje diskusije da li će predlagač prihvatiti naše sugestije, naše amandmane i na osnovu toga ćemo se očitovati kada bude prijedlog. Što se tiče Nacrta mislim, mislim da ćemo podržati danas Nacrt u ovom obliku. Hvala vam.

PREDSJEDAVAJUĆA DRAŽENKA SUBAŠIĆ

Zahvaljujem, gospodin Lemeš.

SAMIR LEMEŠ

Pozdravim svim prisutnim. Ja bih da ukažem na par nelogičnosti u ovom Nacrtu i da se osvrnem na jednu stavku koju mislim da je veoma bitna, a u našem Budžetu je izuzetno zanemarena. Stavka kod osnovnog obrazovanja, ukupni izdaci za energiju iz grijanje su umanjeni po 20 u prosjeku po 25%, za četvrtinu. Upravo usvojenom Rebalansu mi smo imali povećanje, povećanje tih izdataka, sad ih smanjujemo za drastičan iznos, 25% pa me zanima na osnovu čega ste procijenili da ćete uspjeti uštediti 20% energije i to tako toplotne, tako i električne. Ukoliko se radi o nekim mjerama energetske efikasnosti, neko bi trebao dobiti Nobelovu nagradu da tolike, tolika sredstva uštedi samo za godinu dana. Znači to je jedna nelogičnost u ovom Budžetu. Druga nelogičnost je da su sredstva koja su planirana iz

namjenskih sredstava iz Fonda za zaštitu okoliša. To su sredstva koja uplaćuju zagađivači, ajde na stranu što projekti iz Ze-do kantona su daleko manje zastupljeni od projekata iz Sarajevskog Kantona recimo, tako da mi izvučemo zato što nemamo kvalitetnih projekata izvučemo iz Fonda 3 puta manje novaca nego Sarajevo, a uplaćujemo u Fond daleko više zato što su svi zagađivači većinski na teritoriji Zeničko – dobojskog kantona. Ali ima ovdje jedna druga stvar. U ovoj godini 2015.-toj, evo sad smo u Rebalansu usvojili da je planiran prihod iz tih naknada u iznosu od nekih 4,8 miliona što je potrošeno, djelimično transferi općinama, djelimično na nabavku na opremanje ove opreme, djelimično na ove projekte koji su ove godine prvi put finansirani iz tih sredstava, a za 2016. planirana su znatno manja sredstva umjesto 4,8 planirano 3 miliona i 300, 3 miliona i 350. S druge strane kod Ministarstva za prostorno uređenje imate nelogičnu raspodjelu tih sredstava tako da mi planiramo potrošiti ovdje više sredstava nego što planiramo dobiti. Pa evo imamo namjenskih sredstava, tekućih transfera 3 miliona i 50 hiljada i gore 3 puta po 300 hiljada, znači 3 miliona i 950 hiljada rashoda namjenskih, a prihoda imamo 3 miliona i 350. Pa treba vidjeti gdje je tu nastala zabuna, zbog čega je došlo do tog nesklada. Treća stvar koju hoću da napomenem, u našem Budžetu imamo stavku koja se zove Tekući transferi za nauku. Pa ja bih malo da podsjetim samo, pošto kod nas su ti tekući transferi za nauku su se svodili samo na podršku pojedincima za izradu magistarskih i doktorskih radova. I sam sam koristio tu podršku, simbolično, ali je dobro došla. Međutim nije nauka samo plaćanje magistarskog i dokorskog rada. Ja ću vam nabrojati šta se sve podrazumijeva pod naučno-istraživačkom djelatnošću. Drago mi je da ćemo, ustvari nadam se da ćemo iduće godine dobiti Zakon o naučno-istraživačkoj djelatnosti koji je bio u planu ove godine, pa ga nismo usvojili, jedne je bio pripremljen, nadam se da će biti iduće godine. Pa će onda u tom zakonu vjerovatno pisat šta je to naučno-istraživačka djelatnost. To je izrada, objavljivanje, recenziranje naučno-istraživačkih radova, naučne knjige, monografije, naučne studije, naučni i stručni radovi objavljeni u naučnim časopisima koji su dostupni međunarodnoj i domaćoj javnosti, u zbornicima sa naučnih skupova, patent, tehnička rješenja, nove metode, novi materijali, novi tehnološki postupci. Rezultat naučno-istraživačkog rada mora da sadrži elemente originalnosti, novih spoznaja, novih znanja, naučnih pravila ili primjena. Toga kod nas nema. Zato što nemamo novaca za to. Dalje, učešće u realizaciji domaćih i međunarodnih naučno-istraživačkih projekata. Mi za to sredstva nemamo. Učešće u formiranju, razvoju, opremanju laboratorijskih resursa. Nešto malo sredstava se izdvaja ondje u onim kapitalim ulaganjima, nešto malo evo vidim planirano je za opremanje laboratorije za praćenje okoliša, ali je to nedovoljno. Provođenje aktivnosti na popularizaciji nauke i naučno-istraživačkog rada. I tu smo zakazali. Kojem osnovcu je poznato, koji osnovac zna više naučnika nabrojat nego rijaliti zvjezda, ajde sportisti uredu, ali rijaliti zvjezda ili ovih što se sa estrade sigurno djeca prvo zapamte njihova imena, a ne znaju ime ni jednog ili možda jednog naučnika. I normalno da kad odrastu njima nauka je na zadnjem mjestu. Priprema aplikacija za domaće i međunarodne naučno-istraživačke projekte. Evropska unija daje ogromna sredstva za nauku, mi nemamo sredstva da se pripremamo za to, da pišemo aplikacije i da povučemo ta sredstva iz Evropske unije koja nam se nude. I ono što je najvažnije primjena rezultata naučno-istraživačkog rada u praksi s ciljem podizanja kvaliteta života u društvu. Ovo, ovu rečenicu slobodno možemo ovako zaboraviti. Ja ne znam ako ne finansiramo nauku, kako onda možemo očekivati da nam nauka pomogne da riješimo probleme s kojima smo suočeni. E sad da vidimo gdje smo mi tu. U Budžetu je na nauku

planirano slovom i brojem 24 hiljada i 100 maraka. Kako je to u poređenju sa drugim zemljama. Ja znam da Ze-do kanton nije država ali evo uporedite ćemo u odnosu na bruto domaći proizvod. Bruto domaći proizvod Zeničko – dobojskog kantona je u strategiji sam našao taj podatak, toliki je koliki je. Ispada da mi za nauku izdavajamo, 0,001 % bruto domaćeg proizvoda. Evo da se uporedimo recimo sa Alžirom. Od ovih zemalja koje smo, drugih zemalja koje izdvajaju za nauku evo na ovom dijagramu ovo je Ze-do kanton, a ovo tu je Alžir. Jedna od zemalja u svijetu koja najmanje izdvaja za nauku, 70 puta više izdvajaju za nauku nego mi. Ja znam da Federalno ministarstvo obrazovanja, nauke kulture i sporta izdvaja neka sredstva za nauku iako to ministarstvo nema ustavne nadležnosti, kanton ima ustavnu nadležnost za nauku. Ako uzmemo i ta sredstva koja se ne troše na ovo što sam ja nabrojao nego je to jednim dijelom za onako transferi čisto da prežive, ovi instituti da prežive institucije da plate račune za grijanje, znači za projekte ostaje vrlo malo. Al hajde da uzmemo i ta sredstva kojih je u Budžetu Federacije nekih milion i po i Federacija ovdje puno manja od Alžira. Federacija izdvaja nekih 0,015% Budžeta za nauku. A hajd sad kad pogledamo taj nesretni Alžir ovdje sa 0,07% izdvajanja za nauku i uporedimo ga recimo sa Srbijom koja izdvaja 0,35%, a pa Hrvatskom 0,8%, Slovenija 1,4%, a da ne govorim o ovim zemljama koje su daleko ispred nas. Hajd pogodite zbog čega. Pa zato što za nauku izdvajaju Amerika 2,7% Finska i Švedska po 3%, Japan 3,7%, Izrael 4,2%, Južna Koreja 4,4,%. Ako bismo se poredili sa Alžirom Ze-do kanton bi za nauku trebao izdvajati 1,7 miliona maraka. Po našem GDP-u mi izdavajamo 24 hiljade. Ako ćemo se porediti sa Slovenijom recimo, trebale bi nam 33 miliona maraka za nauku samo u Zeničko – dobojskom kantonu. Nadam se da će iduće godine, da ćemo usvojiti taj Zakon o naučno-istraživačkoj djelatnosti, ali taj zakon će biti mrtvo slovo na papiru ako mi i dalje budemo za nauku izdvajali 0,001%, ja se ne bih sramotio. Ja bi prekrizio one 24 hiljade. Hajd da se ne provaljujemo, da se ne sramotimo, hajde da napišemo da uopšte ne izdavajamo za nauku to nam ne treba, jer evo očito nam je stanje dobro čim ne tražimo pomoć nauke, čim ne tražimo naučne rezultate koji bi nam podigli kvalitet života u društvu. Hvala.

PREDSJEDAVAJUĆA DRAŽENKA SUBAŠIĆ

Gospodin Mujanović, neka se pripremi gospoda Delibašić i gospodin Zaimović.

HAŠIM MUJANOVIĆ

Uvažene kolegice i kolege, obzirom da nisam ekonomista ja ću pričati o jednom drugom aspektu kada je u pitanju Nacrt Budžeta. Naime, Vlada Zeničko – dobojskog kantona je na sjednici od 10.12. ove godine utvrdila Nacrt Budžeta i za 2016. godinu i dostavila ga nama u proceduru. U poglavlju IV Zakona o budžetima Federacije Bosne i Hercegovine, a u članu 15. stav 1. propisani su rokovi kod pripremanja i usvajanja budžeta to je tzv. budžetski kalendar. Tako je članom 15. stav 1. alineje 11. Propisano da Vlada utvrđuje Nacrt Budžeta do 1. novembra i dostavlja ga u skupštinsku proceduru do 5. novembra. Na ovakav način kako je Vlada postupila u ovom konkretnom slučaju ona je povrijedila odredbe Zakona o budžetima, nažalost tu imamo problem gdje nema kaznenih odredbi. Dokument okvirnog budžeta je bio ili trebao biti sastavni elemenat ovog Nacrta Budžeta, nisam ga vidio. Na navedeni način povrijeđene su propisane procedure što za posljedicu ima povredu načela demokratičnosti, transparentnosti i javnosti, a što u osnovi ovaj akti čini nezakonitim. Ja postavljam sebi

pitanje i muči me, muči me jedna dilema. Da li smo mi sa ovakvim neblagovremenim dostavljanjem ovog akta namjerno dovedeni pred svršen čin kako bi danas kroz ove rasprave koje će se voditi o Nacrtu Budžeta, možda pomogli Vladi da se ne usvoji Nacrt Budžeta kako bi se donijela Odluka o privremenom finansiranju. Uvažavajući činjenicu da se radi o narednoj godini kao izbornoj godini, za sada izbornoj godini, išla bi Odluka o privremenom finansiranju do 3. mjeseca i nakon toga znamo kako to ide sa kapitalnim izdvajanjima i ostalo. To je neka samo moja usputna, ne mora biti tačna. U članu 1. Budžeta Zeničko – dobojskog kantona za 2016. godinu u poglavlju II Rashodi i izdaci tabelarnog pregleda izvršenje sudskih presuda ostao je iznos rashoda u 2016. godini od 400.000 KM i izvršenju i on je na nivou izvršenja budžeta iz 2015. godine. Taj iznos se ne povećava, a sve ostale stavke se povećavaju i pitanje je zbog čega? Ako se ima u vidu da zatezna kamata teče od dosuđenog potraživanja, znači od dana kada je to potraživanje dosuđeno, onda ovakav odnos prema izvršenju pravosnažnih sudskih odluka ima za posledicu oštećenje imovine Kantona jer se zakonske zatezne kamate svake godine povećavaju zbog neizvršenja ili nepostupanja po pravosnažnih izvršnim sudskim presudama. Podsjetit ću kolege koje evo nisu se bavile ovom problematikom, a vidim da i ovdje samim budžetom se eskivira taj podatak. Naime, Ustavni sud Bosne i Hercegovine na sjednici održanoj 12.10.2011. godine donio je odluku o dopustivosti i meritumu kojom je usvojena apelacija i utvrdio povredu prava na pravično suđenje iz člana 2/3 e) Ustava Bosne i Hercegovine člana 6. stav 1. Evropske konvencije za zaštitu ljudskih prava i osnovnih sloboda i prava na imovinu iz člana 2/3 k) Ustava Bosne i Hercegovine i člana 1. Protokola broj 1 uz Evropsku konvenciju za zaštitu ljudskih prava i osnovnih sloboda zbog neizvršavanja pravosnažnih sudskih odluka Kantonalnog suda Zenica broj 004-0-GŽ-06-001-457 od 05.02.2007. godine. Zbog povrede navedenih prava Ustavni sud Bosne i Hercegovine naložio je Vladi Zeničkog kantona da izvrši svoje ustavne obaveze i osigura poštivanje ljudskih prava kroz sudske presude tako što će poduzeti mjere s ciljem da se povjerioci koji posjeduju izvršne sudske odluke na teret budžetskih sredstava Zeničko – dobojskog kantona naplate u razumnom roku. Ovakvim planiranjem na rashodovnoj strani u visini od 400 hiljada KM ne vidi se da li je Vlada Zeničkog kantona izvršila svoje obaveze iz tačke 52., 53., 54. odluke Ustavnog suda Bosne i Hercegovine. Obzirom da je odluka Ustavnog suda Bosne i Hercegovine iz oktobra 2011. godine i da smo svjedoci da evo 4 godine ta presuda je ignorisana, kako znači iz prethodnih Vlada, tako evo i ova, vidjeli smo to danas. To znači da smo ušli i u 5 godinu realizacije izvršenja pravosnažne izvršne sudske odluke na način koji je suprotan odluci Ustavnog suda Bosne i Hercegovine. Dakle, Vlada Zeničkog kantona je u obavezi shodno navedenoj odluci Ustavnog suda da obavijesti Ustavni sud o poduzetim mjerama s ciljem izvršenja navedene odluke Ustavnog suda Bosne i Hercegovine. Moje pitanje, a nisam nigdje vidio da li je to Vlada ikada uradila, da li je obavijestila šta je poduzela? Obzirom da tamo u pravnoj terminologiji pod razumnim rokom podrazumijeva se vremenski period 6 mjeseci. A evo 5 je godina. Ja ne znam onda šta su uradili. Prema članu 5/1 pod a) Ustava Federacije Bosne i Hercegovine Kanton je obavezan poduzeti sve potrebne mjere na zaštiti ljudskih prava i sloboda utvrđenim člancima 2a do 7 i predviđenim instrumentima u dodatku Ustava, a u dodatku Ustava navedene su 22 instrumenta koji imaju pravnu snagu Ustava i koje svaka Vlada mora poštivati. Podsjetit ću takođe na odredbe Krivičnog zakona Federacije Bosne i Hercegovine, glava 29 koja nosi naziv “Krivična djela protiv pravosuđa”. U okviru člana 351. neizvršavanje sudske odluke

stoji u stavu 1. "Odgovorna osoba u organu vlasti ili pravnoj osobi ili drugim institucijama u Federaciji koja ne postupi po pravosnažnoj odluci suda u Federaciji Bosne i Hercegovine kaznit će se novčanom kaznom ili kaznom zatvora do 3 godine". U stavu 2. Istog člana stoji da kaznom iz stava 1. ovog člana kaznit će se i odgovorna osoba koja odbije izvršiti odluku Doma za ljudska prava Federacije ili odluku Ustavnog suda Federacije koju je dužan izvršiti. Da bi u stavu 3. bilo navedeno ako je krivičnim djelom iz stava 1. i 2. ovog člana prouzrokovana teža povreda prava drugog ili značajna materijalna šteta, učinitelj će se kazniti kaznom zatvora od 1-5 godina. Na nekim od prethodnih sjednica mi smo imali implementaciju presude Ustavnog suda i ona je izvršena u rekordnom vremenu. Ja postavljam pitanje, a ovdje vidimo da ima elemenata i krivične odgovornosti zbog neizvršavanja sud...presude Ustavnog suda po osnovu pravosnažnih izvršnih sudskih presuda, zbog čega se nije i u ovom slučaju postupilo po presudi ustavnog suda? Obzirom da znamo da je budžetski deficit u tom dijelu preko 100 miliona i da je godišnja kamata na taj iznos 12% koja je fiksna kamata, tako da svake godine naš dug raste za novih 12 ili više miliona, ako je odlaganje tog rješenja, a presude se moraju izvršiti, kupovina vremena. Ja ne znam, onda to pokazuje naš neodgovoran odnos prema povjerenim poslovima i zadacima. Evo za sad toliko.

PREDSJEDAVAJUĆA DRAŽENKA SUBAŠIĆ

Zahvaljujem, gospođa Delibašić.

NAIDA DELIBAŠIĆ

Kolega Damir Jukić je rekao sve ono što smo mi na Komisiji za mlade uočili. No, međutim ja sam tražila i da se sastane Komisija za boračka pitanja. Ta Komisija se nije sastala, mislim da se itekako tiče i nje Nacrt Budžeta. Ono što mene interesuje kad pogledam, znam sabrat i oduzet, al nisam neki ekonomski stručnjak, pa molim nekog da mi objasni. Ovako, što se tiče branilačkih populacija, stipendiranje studenata branilačke populacije izvršenje, procjena izvršenja budžeta za 2015. godinu je milion, 526 hiljada, dok je za planiran za ovu godinu milion i 650 hiljada. Pa me interesuje zašto je to toliko povećano. Zatim sredstva za rad branilačkih udruženja, to pohvaljujem jer je ostala ista. Zatim, troškovi organizovanja takmičenja i manifestacija pripadnika boračkih populacija je bilo 63 hiljade, sada je odjednom 80 hiljada. Zatim, novčana naknada zbog izuzetno teške socijalno-ekonomske situacije pripadnika boračke populacije koja je bila milion sada je spuštena na 700 hiljada. Smatram da bi se ova stavka trebala povećati. Isto tako sredstva za liječenje pripadnika branilačke populacije bila 730 hiljada, sad je 700 hiljada. Takođe smatram da se i ova stavka treba povećati i naravno pohvaljujem jednokratnu novčanu, jednokratna novčana sredstva za rješavanje stambenog pitanja pripadnika branilačke populacije koja je sad podignuta. Pa vas molim da mi samo otprilike ovo što sam navela ja, da mi neko objasni od vas zašto je to tako. Hvala.

PREDSJEDAVAJUĆA DRAŽENKA SUBAŠIĆ

Zahvaljujem gospođu Delibašić, gospodin Zaimović, neka se pripremi gospodin Duvnjak, gospodin Midhat Delić, gospodin Rifat Delić.

ĆAMIL ZAIMOVIĆ

Zahvaljujem gospođu predsjedavajuća, dame i gospodo uvaženi premijeru, gospodo ministri, uvažene kolege, gosti, ostali sviju vas skupa selamim i toplo pozdravljam. Vjernicima katoličke vjeroispovijesti takođe čestitam nastojeće blagdane. Obzirom da sam ja u pismenoj formi ću predložiti ovaj ovu izmjenu prijedlog izmjene budžeta. Ja ću samo kratko da upoznam cijenjene i poštovane kolege o čemu se radi. Naime, u ekonomskom kodu, predlažem da ekonomski kod 614 100 koji se nalazi tamo gdje je Ministarstvo privrede, kod gospodina Anđelića, a tiče se Brkića da se stavka od nekih 197 hiljada poveća na određenu količinu, a radi se o ekološkim predispozicijama za onaj kapitalne projekte na u općinama Doboju-Jug, Tešanj, Usora, Olovo, Žepče, Breza, pa i projekat zenički vrijedi pomenuti. Maloprije smo vidjeli u rebalansu budžeta da je ova stavka skinuta, odnosno rebalansirana odnosno da je nema. Dijelom i opravdano vidio sam tamo zbog Zakona o javnim nabavkama koji je proveo ovo vrijeme nisu se uspjeli uvesti izvođači radova po ovom pitanju pa mislim ako bi se objedinili i povećala ova stavka na ove općine koje nisu obuhvaćene u ovoj prvoj fazi, a u narednoj godini dovoljno je samo povećati malo minimalno, ovaj ovu stavku za nekih još 200 hiljada maraka da bi istim intenzitetom, istim tempom, odnosno istim konkursom i natječajima u javnoj nabavci mogli uraditi ove projekte, onaj koje se odnose na Tekući transfer općinama na provođenje projekata Zakon o javnim privatnom partnerstvu. Ukratko reko sam, onaj da ću priložit pisane materijal. Radi se o istražnim radovima – toplifikaciji i predispozicijama da ove općine, onaj riješe ove probleme koje su uglavnom vezane za taj za tu onaj...pa molim onaj gospodina Anđelića i Brkića da nađu prosotra skupa i da ovu stavku na ekonomskom kodu 614100 povećaju za određenu količinu, ja predlažem za još 200 hiljada. Tolko' hvala vam.

PREDSJEDAVAJUĆA DRAŽENKA SUBAŠIĆ

Zahvaljujem, gospodin Duvnjak.

JASMIN DUVNJAK

Neka živi naša domovina Bosna i Hercegovina! Poštovana predsjedavajuća, tajniče, poštovani kolege poslanici, premijeru članovi Vlade, predstavnici medija i gosti. Ja ću veoma kratko da se ne ponavljamo uvažavajući diskusije prethodnih kolega vezano za pojedine aspkete ovog Nacrta Budžeta, prvo jednu generalnu stvar iznijeti, a onda se referirati na budžetskog korisnika Skupština Kantona. Dakle, generalno ono što možemo mi konstatovati što smo konstatovali sa prvim danom rada ove Vlade i utvrđivanjem i Programa rada Vlade, a i kasnije je li Budžeta za 2015. godinu smo konstatovali, ustvari ja sam konstatovao da ćemo uspješnost i kvalitet rada ove Vlade najbolje prepoznavati preko jednog lakmus papira, a to je lakmus papir koji će nam odrediti i pokazati kakav je odnos broja zaposlenih i nezaposlenih u Zeničko – dobojskom kantonu i koliko se kada je u pitanju ovaj segment stvari unapređuju i popravljaju. Informacije koje ja imam govore da se ovdje u značajnoj mjeri krvna slika popravljaju i evo konačno nakon dužeg vremena barem po ovim preliminarim informacijama koje ja imam, da se ovdje stvari popravljaju vezano za povećanje broja zaposlenih u Zeničko – dobojskom kantonu i ja bih između ostalog sad skroz pojednostavio priču o budžetu i radu Vlade, samoj Vladi na način da kažem da su to indikatori koji mogu da nas raduju i da nas ohrabruju i ja želim, a naravno, da sve ove dobronamjerne sugestije svih kolega zastupnika za

koje vjerujem da će Vlada uzeti u obzir. Da Vladi damo ovdje jednu podršku vezano za ta sve ukupna nastojanja i napore da se situacija uozbilji da se stvari unapređuju, da se problemi rješavaju, da vidimo više radnih mjesta, da vidimo više investicija, više proizvodnje i u konačnici naravno onda će biti ovi budžeti bogatiji, pa će biti više novca za ove da kažem kreativne segmente budžeta, da ih ja tako nazovem. Jer negdje sam pročitao da možda nema te Vlade na svijetu da je njen posao i prioritetni zadatak da se ona bavi otvaranjem novih radnih mjesta. Ali složiti ćete se sa mnom da koliko god Vlada bila uspješna da ne može direktno da otvara nova radna mjesta, ali ćete se složiti sa mnom da loša Vlada ili loše Vlade mogu da zatvaraju radna mjesta. Znači, znači ipak imamo jedan direktan upliv i na tržište i na stanje standarda građana i ukupne ekonomske, socijalne prilike i ja želim gledati upravo angažman ove Vlade na način da je ona taj, da već jeste ta koja će popravljati stvari da imamo više investicija, više proizvodnje, više radnih mjesta u konačnici. veći standard naših građana i da neće djelovati tako da je za posljedicu njeno djelovanje da se smanjuje, da se smanjuju ovi parametri, od broja radnih mjesta do svih drugih segmenata koji su bitni i koji bitno određuju standard građana. To je generalno, a što se tiče konkretnih propusta, u saradnji sa uvažanim sekretarom Skupštine, gospodinom Avdagićem, dakle ukazalo se, ja bi zamolio ministra finansija da u pripremi utvrđivanju Prijedloga Budžeta se razmotri ovaj dopis koji je došao iz Skupštine, sekretarijata na ukazane greške i propuste. Pošto ovdje imamo jako apsurdnih situacija i nevjerovatnih nelogičnih pozicija koje ranije nisu postojale, osiguranje bankarske usluge, gorivo, usluge prevoza i ostale, iznajmljivanje imovine i opreme koje nisu, dakle, ovaj do sad se uopšte nisu postojale kao stavke u okviru Skupštine kao budžetskog korisnika, tako da bih zamolio uvaženog ministra finansija i one koje budu pripremali, u konačnici Vladu koja bude utvrđivala Prijedlog Budžeta za narednu godinu da se obligatno, znači obligatno podvlačim sve stavke vezane za rashode u okviru Skupštine Kantona budu na onom iznosu koji je, dakle, minimalan, minimalno na nivou ovogodišnjih. Znači mi ovdje imamo određena rapidna smanjivanja koja meni, a evo i Sekretarijatu apsolutno nisu jasna i imamo čak ovdje navođene nekih stavki koje više priliče da se nađu u okviru Službe za zajedničke poslove nego u okviru Skupštine, kao budžetskog korisnika. I zamolio bih znači ministra da se, ovaj detaljno izučiti analizira dopis iz Skupštine vezan za greške i propuste u Nacrtu Budžeta koje se odnose na budžetskog korisnika Skupština i da se sve te greške i propusti uz ovu našu današnju diskusiju otklone, da bi Skupština mogla normalno da radi, djeluje i funkcioniše na zadovoljstvo svih, i zastupnika i Sekretarijata, a naravno i svih građana u Zeničko – dobojskom kantonu. Zahvaljujem se i neka dragi Bog čuva našu domovinu Bosnu i Hercegovinu! Hvala.

PREDSJEDAVALA DRAŽENKA SUBAŠIĆ

Zahvaljujem, gospodin Midhat Delić.

MIDHAT DELIĆ

Koristim priliku da pozdravim sve prisutne u sali, s obzirom da mi je ovo prvi put da izlazim danas za govornicu, jel. Pretpostavljam da će biti još dosta govornika vezanih za ovu tačku dnevnog reda pa ću nastojati da budem što kraći u ovom svom izlaganju. U početku svog izlaganja želio bih da spomenem dvije stvari. Prvo ja nisam ekonomista pa se u neke stvari ne razumijem, je li, pa molim unaprijed za oprostjenje ako negdje napravim neki lapsus ili grešku

pogotovo stoga što sam imao vrlo malo vremena kao i ostali poslanici, s obzirom na vrlo kratko vrijeme koje smo imali na raspolaganju da proučimo materijale. Dakle, neke stvari bih ja vjerovatno pitao ljude koji se bolje razumiju od mene u ovo, u ovu materiju ali jednostavno nisam imao vremena, dakle svega par dana, jel. I druga stvar, ovaj ovdje nisam uspio upratiti s obzirom da mi je loše iskopiran ovaj materijal, dakle pojedini dijelovi, pojedini dijelovi nisu uopšte kopirani tako da ne mogu pratiti one pozicije kad je u pitanju, kad su pitanju one oznake razdjela pa ekonomskog koda i tako dalje. Pa eto molba za ubuduće ovima koji se bave tim stvarima, dakle da malo povedu računa o tome kako bi se to moglo lakše i jednostavnije pratiti. Ja ću u okviru ovog svog izlaganja bazirat se na neke 3 stvari koje su meni vako naročito interesantne. Prva stvar je ste što nisam nigdje primjetio, a već sam se ogradio da nisam ekonomista pa možda ja to nisam dobro ni uočio. Nisam primjetio da nisu nigdje planirana sredstva za borbu protiv korupcije. Naime, ja kao predsjednik Komisije za borbu protiv korupcije moram ukazati na ovu činjenicu s obzirom da je u protekle dvije godine u okviru projekta PAK – podrška anitkorupciji, koji je završen, koji je završen prošle sedmice jednom završnom sesijom, traženo da se na svim nivoima vlasti prediđa, predvide određena sredstva za borbu protiv korupcije u skladu sa Zakonom o agenciji za prevenciju korupcije i borbu protiv korupcije, dakle koja traži da se u narednom periodu donesu Strategija borbe protiv korupcije i akcioni plan za provođenje te strategije i svakako da će i jedan i drugi dokument iziskivati određena sredstva za njihovo sprovođenje, pa smatram da bi bilo dobro, dakle da u Prijedlogu Budžeta Ministarstvo finansija uzme u obzir ovu preporuku i onih koji su nama držali ta predavanja u sklopu, dakle tog projekta PAK, a evo i mene kao predsjednika Komisije za borbu protiv korupcije. Druga stvar na koji bih se želio osvrnuti jeste što sam ja na sjednici 20.-toj, dakle koja je održana prije 14 dana podnio jednu inicijativu, da podsjetim zastupnike vjerovatno se sjećaju radi se o tome da sam ja podnio jednu inicijativu da se u Nacrtu Budžeta planiraju sredstva ili dio sredstava naglasio sam za izgradnju novog objekta Srednje tehničke škole u Kaknju. Nisam još dobio nikakav odgovor vezan za tu inicijativu. Primjetio sam da je u budžetskoj organizaciji 2201 planirana cifra od milion i 5 hiljada KM za Ministarstvo obrazovanja gdje bi trebalo smjestiti, jel' pa me evo zanima da vidim da li je u okviru te cifre planiran dio tih sredstava za aktivnosti koje bi trebalo poduzeti da bi se taj posao počeo raditi, dakle. Ovo naglašavam pogotovo sa aspekta energetske učinkovitosti koju je maloprije spomenuo ministar za financije. Spomenuta su neka određena sredstva koja bi se trebala implementirati u oblasti obrazovanja. Evo sa stanovišta te energetske učinkovitosti ja odgovorno tvrdim da je ova zgrada energetski potpuno neučinkovita i da se ne može nikakvim drugim zahvatima ta energetska učinkovitost povećati, evo ilustracije radi ona se popularno kod nas zove kartonska ili papirna škola. Dakle, teško je tu energetska učinkovitost povećati, dakle i vezano za to nadam se da će mi se odgovoriti na ovo moje pitanje odnosno na ovu inicijativu. Dakle, da se predividi taj jedan određeni dio sredstava kojim bi se krenulo konačno u realizaciju tog projekta s obzirom da je eto bići malo dosadan, ponavljam da je to jedini objekat montažnog tipa, iako mi je ministar rekao da ima i u Zavidovićima, možda je neki drugi oblik montažnog ali eto dakle ovaj je jedini objekat montažnog tipa koji se popularno zove kartonska škola i usput još da kažem da je to jedina vjerovatno škola, ne usuđujem se reć da je jedina, vjerovatno jedina škola koja nema fiskulturnu salu i koja nema radionice za praktičnu nastavu. Dakle, sazrelo je vrijeme da se krene u ove aktivnosti i mislim da bi Ministarstvo obrazovanja kao osnivač škola trebalo da

krene, dakle u realizaciju ove inicijative. I treća stvar koju bi htio napomenuti jeste isto tako jedna moja inicijativa koju sam podnio prije otprilike prije 3 mjeseca, a vezana je za projekat sterilizacije pasa kao što je urađeno u Kantonu Sarajevo. Nikad nisam dobio odgovor na nju. Pa evo sad je možda dobra prilika da se određeni dio sredstava planira i uvrsti u Prijedlogu Budžeta pogotova stoga što se sad to pitanje aktuelizirano i na nivou Federacije BiH. S obzirom na određene tužbe koje su uslijedile od strane pojedine građana gdje se otprilike kaže ili je intencija da se donese zakon gdje će se ta cijela oblast prebaciti na kanton odnosno kantonu u amanet, jel. I još ću kratko iskoristiti priliku da ukažem na neke dobre i na nekoliko loših stvari, dakle kako bi ostalo vremena za ostale govornike. Pa evo recimo dobre stvari koje sam primjetio da su predviđene u ovom Nacrtu Budžeta jesu povećanje Transfera za posebno nadarene i talentovane mlade, mislim da je povećanje simbolično mislim da je 1.500 KM, ali je dosta je, neka je dakle išlo se samo naprijed. Zatim podsticaj za aktivne mjere zapošljavanja, povećanje 100 hiljada KM, ovdje koristim priliku samo da upozorim i nadam se da se neće ta sredstva nega...iskoristiti u neke druge svrhe s obzirom da nam je poznato šta se sve dešavalo u Zavodu za zapošljavanje za vrijeme direktora koji je smijenjen, jel'. Dobra stvar što je poticaj za zapošljavanje mladih povećan za nekih 70 hiljada KM, dakle u prošlom Budžetu je to bilo 30 hiljada KM, tako da je to povećanje što se tiče procenta znatno, što se tiče cifre možda i nije, ali što se tiče procenta jest. Zatim podsticaj za samozapošljavanje boraca, dakle povećanje za 700 hiljada KM, to je isto tako za svaku pohvalu i recimo što sam primjetio što mi je posebno zapalo za oči jest Transfer za Zemaljski muzej, odnosno pretpostavljam da je riječ o tome s obzirom da finansiranje Zemaljskog muzeja nije još uvijek riješeno na višim nivoima. Dakle, dobra je stvar što je ovo Vlada predvidjela i evo ja koristim priliku da pohvalim onog koje to uradio. Ukazat ću i na par loših stvari koje sam primjetio, naravno ima ih više, al da ostavim ostalim kolegama prostor. Dakle, Tekući transfer za stipendiranje studenata je manji za 100 hiljada KM, žao mi je što je to tako, volio bi da nije i sugeriram da ako je moguće da se ne umanjuje, ako se ne može povećat, neka se barem ne umanjuje. Zatim, pomoć u prehrani djeteta 6 mjeseci. tako dalje umanjena je isto za 100 hiljada KM, ako se ne može povećat neka se barem ne umanjuje. I novčana pomoć za nezaposlene porodilje također je umanjena za 15 hiljada KM, što mi je također žao. Eto u najkraćem toliko, zahvaljujem na strpljenju i na ukazanom povjerenju. Hvala lijepo.

PREDSJEDAVAJUĆA DRAŽENKA SUBAŠIĆ

Zahvaljujem, gospodin Rifat Delić.

RIFAT DELIĆ

Što ima ovih Delića, Mašallah. Zahvaljujem predsjedavajuća, pozdravljam Vas, Vaše saradnike, predstavnike Vlade, premijera, kolege zastupnike, medije, goste, sve prisutne u sali. Ja sam evo izdvojio 6. tačaka po kojima ću govoriti o ovom Budžetu i krenut ću od Tekućeg transfera za ustanove kulture koji iznosi 2,9 miliona konvertibilnih maraka. Nastavlja se stara praksa, Vlada je finansijer, a obični osnivači i upravljačku strukturu nad ustanovama kulture i dalje drže. Mislim da do Prijedloga Budžeta, Vlada treba da održi sastanak sa načelnicima općine i da konačno oni preuzmu odgovornost nad ustanove čiji su to osnivači i da preuzmu veći dio finansiranja, a ne kao do sada da 90% sredstava dolaze iz Kantona, a općine daju samo nekakvu pomoć, iako su oni ti koji bi trebali da finansiranje tih

ustanova imaju u svojim budžetima i svojim programima. Transfer, Tekući transfer udruženjima Ministarstva za rad, socijalnu politiku ima index 750, ne znam o čemu se radi, bilo je za 2015.-tu 10.000 sad 75.000 maraka. Nisu to neki veliki novci za ovaj Budžet, ali volio bih da znam ako je bilo do sada 10.000 šta je sad razlog da se ovoliko poveća? Tekući transfer za sport, index 90, smanjen za gotovo 60.000 maraka i tu su saglasni svi zastupnici da se on mora povećati i vratiti na period iz ranijih godina, kada je bio dosta više, inače kakvu poruku šaljemo uspješnim sportistima i mladim ljudima koji se nadaju da će doseći slavu i veličinu Amela Tuke i drugih uspješnih sportista sa naših, našeg Kantona. Subvencije javnim preduzećima, index 169, povećanje za 4 miliona maraka, javna preduzeća su ona koja trebaju biti nosioci finansijskog razvoja, ako gledamo više državne nivoe javna preduzeća kao što su BH Telecom, BH Pošta, Auto ceste, Elektroprivreda, i tako dalje, to su preduzeća koja ostvaruju ogromne dobiti, a kod nas dobijaju subvencije i mislim da treba težiti ka ukidanju tih subvencija, ka smanjenju tih troškova, a ne i dalje da iz Budžeta Kantona tim javnim preduzećima idu subvencije u iznosu od 10 miliona konvertibilnih maraka. Mislim da do izrade Prijedloga Budžeta, da se te stvari moraju malo drugačije postaviti. Ured premijera, plaće i naknade, index 134, povećanje za 65.000 maraka, broj zaposlenih 6 i ostaje planiran 6. Da li to znači povećanje plaća u tom, ili nakon usvajanja Budžeta, upošljavanje nekih novih ljudi. Isto je i sa Kantonalnom upravom civilne zaštite, gdje povećava se na 5 zaposlenih plaće i naknade za nekih 40.000, ostaje isti broj zaposlenih, znači, želio bih da dobijem neko obrazloženje za te povećanje tih stavaka. E ono što me najviše pogodilo jeste planirani Budžet u Ministarstvu za prostorno uređenje, promet i komunikacije. Čini mi se da odgovorni u tom ministarstvu nisu znali šta će sa milion maraka pa su ih onako paušalno postavili na neke pozicije. Ja ću Vam evo pročitati ovdje, izdaci za materijal i usluge, index 540, izvršenje u 2015-toj 66.000, plan u narednoj godini povećan za 300.000 maraka. Ugovorene i druge usluge, index 670, odnosno sa 52.000 na 350.000 maraka. I onda, nakon izdataka za materijal i usluge imaju neke ostale ugovorene usluge gdje index 6159, odnosno povećanje sa 5.000 na preko 300.000 maraka. Nevjerovatno, u prošloj godini mogli proći sa 5.000, sad nam treba 350.000. Povećanje sa 50 na 350, mislim da u tom ministarstvu moralo se ozbiljnije prići planiranju Budžeta ili su nakon izrade svog budžetskog zahtjeva ostali sa neakvim parama koje nisu uspjeli rasporediti i hajde staviti ćemo tu, pa ćemo prilikom izrade Programa utroška sredstava izvršiti preraspodjele i slične stvari. Eto, to su ona pitanja na koja bi ja želio da dobijem odgovor i u konačnici nadam se da će do izrade Prijedloga, Vlada uzeti ovo u obzir i izvršiti neke popravke, odnosno korekcije u Prijedlogu Budžeta. Hvala.

PREDSJEDAVAJUĆA

Zahvaljujem.

Gospodin Husejnagić.

MUNIB HUSEJNAGIĆ

Nekom su ostali ovamo materijali, ali eto, nema veze. Ovaj, ja imam jednu generalnu primjedbu prema Vladi Ze-do kantona i poštivanje ove Skupštine, nama je svima poznato da smo mi trebali imati na dnevnom redu do septembra mjeseca Izvještaj o šestomjesečnom poslovanju, ostvarenju Budžeta i da ga ova Skupština raspravlja. I mi bi dosta lakše sad pričali i o ovom Budžetu i o rebalansu i o svemu. Znači, obaveza je bila Vlade u Programu rada

Vlade i u Programu rada Skupštine da nam urade šestomjesečni izvještaj o ostvarenju Budžeta, da nam dostavi i da to u septembru mjesecu, do kraja septembra to raspravimo kako je moglo dalje, ali evo, imamo što imamo, znači nije u prethodnim godinama je to bila praksa, ali praksa donošenja Budžeta je išla i u ovoj redovnoj proceduri, al bilo je i godina kada je usvajano odmah direktno dakle išao kao prijedlog i to nije neobično, je li tako, kada je u pitanju parlamentarni rad. Kad su u pitanju prihodi smatram da je predviđen u Nacrtu samo simbolično povećanje od 4,3 miliona i mislim s obzirom na trend i u ovoj godini i kretanja koja ne predviđaju da će biti nekih na tržištima ili neke recesije, trebalo je biti najmanje, po mojoj procjeni, to bi trebalo biti najmanje 10 miliona povećanje u odnosu na ostvarenje u ovoj godini. Smatram također da je u ovoj, u ovom Budžetu, Nacrtu Budžeta predviđeno preveliko kreditno zaduženje s obzirom na redovne prihode koji se ostvaruju i da su oni skoro na istom nivou kao i ostvarenje ove godine ili simbolično 100.000 maraka ispod 16,9 miliona, 17 miliona, znamo da je u ovoj godini. Mislim da to ne bi trebalo biti više u odnosu na obaveze po vraćanju ino i domaćih kredita koji je negdje oko 11 miliona i nešto. Mislim da je, evo, i ovom Budžetu su planirane subvencije preduzećima i poduzetnicima, ponovo povećanje za 52 %, a imali smo, evo, u ovoj godini da je to ostvarenje samo bilo fiktivno stavljeno od milion i po, a ustvari ostvarenje je bilo svega na nivou 50%. Ponovo podvlačim i ovo kad je u pitanju zakonska obaveza finansiranja investiciono-tekućeg održavanja u Kantonalnoj bolnici u skladu sa Zakonom o zdravstvenoj zaštiti i mislim da je ponovo transfer taj 0 u kapitalnim izdacima, a da je došlo do smanjenja u Nacrtu predviđenih kapitalnih transfera iz oblasti zdravstva, opet su oni zabunili sa 2,6 miliona na 2,4 miliona iako imamo povećanje Budžeta. Također, dalje mislim da imamo neku nerazjašnjenu situaciju kad su u pitanju stavka plaća i naknade troškova zaposlenih u Uredu premijera, bojim se da to nije nešto zavijeno, i to bi trebali dobiti odgovor. Tu je povećanje za 34 %, ili 63.000 maraka, a nije predviđeno povećanje broja zaposlenih, ostalo je 6 zaposlenih, što je povećanje otprilike 1.000 maraka po zaposlenom na mjesečnom nivou, i što ne odgovara da li je to predviđeno da u toku godine ima sredstva pa da dođe do zapošljavanja i tako dalje, to bi evo želio odgovor. Također, kad je u pitanju generalno zaposleni, moram prokomentarisati jer sam snimio stanje i mi imamo trenutno 8.212 zaposlenih na Budžetu koji primaju plaće na Budžetu ovog Kantona i imamo hajmo reći neznatno povećanje mada i ono ne bi trebalo biti od 13 uposlenika i predviđeno je u Nacrtu 8.225, i to ne bode oči. Međutim, stvarno u Budžetu po ovom Nacrtu imamo povećanje broja zaposlenih za 58 u administraciji, što je neprihvatljivo za trend i ovo vrijeme, kad kažemo, i trend je znači da podstičemo zapošljavanje u realnom sektoru, a smanjenje od administracije. Zašto ovo govorim? Zato što je u samo jednom ministarstvu, Ministarstvo obrazovanja predviđeno smanjenje za 45 uposlenika, za 45, a trebalo možda i 100, evo ja, slobodna moja procjena s obzirom na broj učenika, s obzirom na broj odjeljenja i tako dalje. Ovo je simbolično možda 45, i evo dobro je da je planirano da je krenulo da se prilagođava potrebama, a stvarno imamo ukupno povećanje za 13, znači ovih 45 je 13 povećanje u odnosu na bruto jer to, to je ustvari 58 broj zaposlenih više u administraciji u odnosu na trenutno koliko ima i mislim da to nije prihvatljivo. Evo to su neke primjedbe na ovaj Nacrt, a svakako ću imati u daljoj raspravi i ostale svoje prijedloge. Hvala vam.

PREDSJEDAVALA

Zahvaljujem.

Gospođa Ugarak

MELDINA UGARAK

Prije nego što uputim 4 prijedloga na Nacrt Budžeta za 2016-tu godinu., željela bih da poželim i da čestitam predstojeće katoličke praznike, da ih provedu u miru i blagostanju. Ja ću danas predložiti 4 prijedloga. Želim da podnesem prijedlog na Nacrt Budžeta za 2016-tu godinu., i to da se Ministarstvu za rad, socijalnu politiku, izbjeglice predvidi dodatnih 200.000 maraka na poziciju transfer za osobe sa invaliditetom, za potrebe civilne žrtve rata.

Drugi prijedlog koji želim da uputim na Nacrt Budžeta za 2016-tu godinu, također, da se Ministarstvo za rad, socijalnu politiku, izbjeglice predvidi povećanje iznosa na Tekućem transferu, neprofitnim organizacijama sa 75.000 na 100.000 i predvidi 20.000 za rad Saveza civilnih žrtava rata Maglaj. Obrazloženje kratko koje je vezano za prvi prijedlog i drugi, on glasi: Savez civilnih žrtava rata Maglaj ima zavidan pozitivan status, kada se radi o konkretnim aktivnostima i učešću u rješavanju problema populacije koja ovoj grupaciji pripada, civilne žrtve rata su na margini egzistencije, ali ovaj savez itekako popravljajući status civilnih žrtava rata, stavljam da im se treba u ovom kontekstu dati podrška jer su opravdali svoje postojanje kao Udruženje.

Treći prijedlog koji želim da predložim jeste na nacrt Budžeta za 2016-tu godinu, da se Ministarstvu za obrazovanje, nauku, kulturu i sport predvidi dodatni iznos od 200.000 na poziciju Tekući transfer za sport, za koji je trenutno predviđeno 495.000. Kratko obrazloženje, povećanje sredstava na Tekućem transferu za sport bi realno omogućilo da se dva dokumenta koja su napravljena i usvojena od strane Skupštine Zeničko-dobojskog kantona realizuju, a radi se o dvjema strategijama koje sam već ranije spominjala, to jeste Strategija omladinske politike na Zeničko-dobojskom kantonu, Strategija razvoja sporta na Zeničko-dobojskom kantonu, koje su napravljene u svrhu poboljšanja statusa mladih i sportista.

Zadnji prijedlog, a ne tako bitan jeste, želim da podnesem prijedlog da se u Budžetu Ministarstva za privredu, na poziciju razvoja turizma predvidi iznos od 150.000, za potrebe asfaltiranja puta za izletišta Ravno u Visokom. Kratko obrazloženje-razvoj turizma je definisan kao strateški interes kantona i Federacije, asfaltiranjem puta, rekonstrukcije postojeće trase, proširenje i izrada parkinga za autobuse na izletištu Ravno, zatim proširenje parkinga kod ulaza u labirint, podzemnih tunela Ravne, izgradnja toaleta, izgradnja potpornih zidova i drugo, poslali bi jasnu poruku da brojnim turistima da naša zajednica želi potpuno uređenje jedne izuzetno značajne destinacije koja će doprinjeti znatno boljoj turističkoj promociji, sigurnijem prijemu turista, većem broju posjetilaca, a sve je to veliki zamajac za zapošljavanje većeg broja ljudi. Općina Visoko je uradila projektnu dokumentaciju i pribavila sve potrebne dozvole. Hvala.

PREDSJEDAVAJUĆA

Zahvaljujem.

Gospodin Begić.

SENAID BEGIĆ

Zahvaljujem.

Koristim priliku da pozdravim sve prisutne, također građanima Bosne i Hercegovine koji slave Božić, čestitam, ovaj, nastupajući Božić. Također i onima koji slave Novu godinu, i Novu godinu, mada ćemo imati vjerovatno još jednu sjednicu pa ćemo imati priliku da uputimo i te želje i čestitke. Što se tiče ove današnje tačke dnevnog reda koja se odnosi na Nacrt Budžeta, možda ću se ponoviti sa nekim od zastupnika koji su uzimali diskusiju po ovom pitanju prije mene, ali neću govoriti o ciframa, obzirom da je u pitanju radni materijal, samo ću se fokusirati na nekoliko cjelina za koje bi volio obrađivača, odnosno volio bih, molio bih da Stručne službe, odnosno Vlada Kantona u ovom periodu do samog prijedloga Budžeta u obzir uzme, u skladu sa svojim mogućnostima, u razmatranje slijedeće stavke. Vidim tamo da je, kad je u pitanju Ministarstvo unutrašnjih poslova, da nema povećanja nekog izdvajanja sredstava za to resorno ministarstvo. Poučeni iskustvom iz 2014-te godine kada smo imali u februaru ono što smo imali i kada vidimo kako zemlje u okruženju reaguju kad je u pitanju i vojska i policija, mislim da bi dobro bilo u ovom dijelu predvidjeti veći iznos sredstava koji bi se odnosio u najmanju ruku na bolju, bolje opremanje policije. U tom dijelu ja ne bi sad ulazio u ono šta to treba, ozbiljnije bi se ovome posvetio u prijedlogu amandmana koji će se odnositi konkretno zašto bi to trebalo da se opredjelimo kada je u pitanju bolja opremljenost policije, ali mislim da zavređuje ovo vrijeme i okolnosti u kojima živimo, da zavređuje pažnju i da u tom dijelu napravimo pomaka kad je u pitanju planiranje budžetskih sredstava. Druga cjelina za koju bih htio da se posveti pažnja, naravno u skladu sa mogućnostima, a konkretne prijedloge ćemo imati vjerovatno putem amandmana i kroz javne rasprave. To je dio koji se odnosi na zdravstvo, odnosno posebno na Kantonalnu bolnicu Zenica, da se nađe neki model koji bi pored ovih planiranih, čini mi se 2,5 miliona maraka sredstava obezbjedio dodatna sredstva, gdje bi se ciljano ta sredstva transferirala bolnici, a kroz posao sam došao do saznanja da ima par takozvanih žarišta kad je u pitanju Kantonalna bolnica Zenica u smislu one opreme koja ne zavređuje velike novce, u smislu investicija i popravke i održavanja pojedinih aparata, pojedinih stalnih sredstava. S druge strane pravi ogromne rashode i Kantonalnoj bolnici direktno, a indirektno Zavodu zdravstvenog osiguranja u smislu faktura koje se zbog te opreme koja je, za koju je bolnica u nemogućnosti da je popravi, ogromne fakture šalje... uzrokovana šteta cjelokupnom sistemu je način da izdvajamo ogromna sredstva za vankantonalno liječenje. To ću samo jednim banalnim primjerom predočiti. Mi smo imali nedavno situaciju gdje smo bili u mogućnosti da pomognemo u popravci jednog aparata unutar Kantonalne bolnice. Popravka je koštala nekih 14.000 maraka, a samo 5 operativnih zahvata koje su urađeni u kliničkom centru Sarajevo u 15 dana za naše pacijente fakturirani su po iznosu od 2.500 maraka. Znači mi smo za 5 operativnih zahvata koji bi bili i plaćeni, riješili problem u Kantonalnoj bolnici Zenica i time spriječili odljev velikog iznosa novca. Ovo je samo jedan primjer, znači, ovo dajem samo u razmišljanje, a kako transferirati taj iznos planiranih sredstava novca planiranih prema Kantonalnoj bolnici. Znači da se nađu određene, da to budu namjenska sredstva baš za ono što je goruće. I treće, treća stvar na koju bih se osvrnuo, to je sport, zaista, stvarno bi mi trebali da vratimo izdvajanja za sport barem na onaj nivo iz 2008-2009-te godine. Ja sam i u ranijim, prilikom i ranijih planiranja Budžeta i kroz rad Komisije za mlade, putem amandmana i kroz direktno učešće u raspravama kad su u pitanju Budžeti, predlagao i ovaj put ću predložiti, ma kako to shvatio da se planira 0,5 % Budžeta za sport. To govorim isto iz razloga što sam dugogodišnji aktivista, čovjek koji se direktno suočavao zajedno sa svojim prijateljima u

raznoraznim upravnim odborima, skupštinama sportskih klubova sa situacijama gdje jednostavno moramo da prosimo novce da bi platili, ako ništa, kotizaciju za učešće naših klubova. Znači oni klubovi iz raznih sfera sporta koji su od interesa za Zeničko-dobojski kanton bi trebali na osnovu planiranih sredstava Zeničko-dobojskog kantona barem da imaju obezbjeđena sredstva za kotizaciju, skupu kotizaciju i učešće u takmičenjima. Tu problema nema fudbal, imamo primjer kako su oni riješili,plaćanje kotizacije, to je putem plaćene kotizacije od strane njihovog generalnog sponzora BH Telekoma, ali u ovom dijelu, znači, košarka, rukomet, odbojka, pojedinačni sportovi, imali smo primjer, neko je pomenuo i Amela Tuku, znači imamo ogroman potencijal i imamo i dobre rezultate tih klubova, ali kada bi, zamislite kakvi bi ti rezultati bili kada bi povećali izdvajanja za sport. To nisu veliki novci sigurno. Mislim da iznos od 490.000-500.000 maraka za sport je simboličan i da taj iznos treba podići na nivo, ja ću to sigurno i putem amandmana predložiti, a to je da to bude 0,5 % od planiranog Budžeta Zeničko-dobojskog kantona. Vjerujte, ti novci neće sigurno biti potrošeni uzalud, a može se naći načina da se to obezbjedi. To bi u suštini bili moje generalne primjedbe na sam Nacrt Budžeta, a kažem putem javne rasprave i putem procedure kroz amandmane, bit će i konkretnih amandmana, gdje će se decidno definisati određene cifre u smislu prijedloga i određene cifre tamo na rashodovnoj strani kako to obezbjediti u Budžetu. Zahvaljujem.

PREDSJEDAVAJUĆA DRAŽENKA SUBAŠIĆ

Zahvaljujem gospodine Begić.

Ja imam jedno pitanje za ministra finansija, na prihodovnoj strani je značajno umanjen prihod od poreza na dohodak. Iz kojih je to razloga i koje su to projekcije, da li je možda greška u samom Budžetu, Nacrtu Budžeta? A što se tiče rashodovne strane, interesantno je da se mi polako ali sigurno približavamo ovoj cifri od recimo nekih 300 miliona konvertibilnih maraka i kako god taj Budžet raste, naknade za porodilje se smanjuju. Činjenica da se i smanjuje broj porodilja, odnosno broj novorođene djece, ali to nije razlog da se ove naknade ne povećaju po porodilji, jer definitivno ne možemo zaključiti da su one adekvatne. Evo primjera radi, samo znači, ...za ovaj,u ovom Budžetu je naknada za novčana pomoć nezaposlenim porodiljama smanjena sa vrlo mizernih 150.000 koji smo uspjeli realizovati u 2015-toj godini na 135.000, također je smanjen dodatak za djecu sa 4.242.000 na 4 miliona, također jednokratna pomoć za opremu novorođenog djeteta sa 110.000 na 90.000, pomoć u prehrani djeteta do 6.mjeseci-dodatna ishrana za majke dojilje, sa 430.000 na 360.000 i ovo je jednostavno poruka da nam ovaj status zemlje koja lagano teži ka takozvanoj „bijeloj kugi“ odgovara. Ja Vas molim, ako već planiramo povećanje Budžeta na prihodovnoj strani bilo ono iz kredita, bilo povećanjem relano povećanjem prihoda, da se ove stavke ne smanjuju nego da ostanu barem na istoj razini. Mi smo svi deklarativno, znači, za porodilje, za socijalnu zaštitu, za žene, za ravnopravnost polova, al onda kad treba izdvojiti novac u te svrhe, onda tu nekako ta priča se malo zaboravi i potisne. Što se tiče Ureda premijera, jasno je da ovdje stoji da je povećanje plata predviđeno za 34%, nije predviđeno povećanje zaposlenih zaposlenika iz jednog razloga zato što je sistematizacijom sistematizovano, koliko sam ja upoznata, 6 zaposlenika. Trenutno u Uredu premijera, nisu popunjena ta radna mjesta i ja zaista nemam ništa protiv da se ovaj Ured popuni, da adekvatnije radi i nemam primjedbe na taj dio iz tih razloga. A ono što imam primjedb u je da se tekući transferi, pojedincima neprofitnim organizacijama povećavaju i

nekako mislim da premijer svojom, kao što reče neko, prva violina, svojim primjerom treba pokazati tu štedljivost pogotovo kad se radi o ovoj vrsti transfera i pogotovo kada pred nas dolazi predizborna godina. Također, željela bih objašnjenje za stavku koja je za 400% veća za tekući transfer pojedincima Kantonalne uprave civilne zaštite koja ide iz namjenskih sredstava i koja je realizovana u iznosu od 175.000, znači, konvertibilnih maraka u 2015-toj godini, a u 2016-toj godini se planira 700.000. Prvo, šta znači taj dio izdataka iz nenamjenskih sredstava i zašto je predviđeno ovoliko povećanje? Što se tiče Ministarstva unutrašnjih poslova, mi smo skoro cijelu godinu potrošili na to objašnjavajući Ministarstvu unutrašnjih poslova da treba da svoje snage poveća i to povećanje je predviđeno za manje od 20 ljudi. U isto vrijeme, znači imamo povećanje i ostalih, znači, hajd' da kažem na nivou Budžeta za nekih, kao što je rekao gospodin Husejnagić, za nekih 15 do 17 zaposlenih, da je drastičan pad zaposlenih na školstvu. Kad se uzme ovo u obzir dođemo otprilike na nekih možda 30 do 50, treba uzet kalkulator, pa ovo dobro sračunat da li, pošto ima jako puno i grešaka u samom Budžetu, otprilike nam dođe da je predviđeno novih 30 do 50 radnih mjesta u administraciji što mogu reći da je samo posljedica novog Zakona o državnoj službi pa je potrebno sve savjetnike, nove pomoćnike ministara na neki način predvidjeti, al evo da ne prejudiciramo stvari, cijela narodna godina je pred nama tako da je samo za Ministarstvo za pravosuđe i upravu povećanje zaposlenika za 3, a ono što mi nije jasno, znači kako je moguće da se predvidi povećanje od 28 zaposlenika u Kantonalnom tužilaštvu, a da plate budu na nivou za 3% manje nego protekle godine. Vjerovatno postoji obrazloženje i za ovo ali onaj...il ove stvari treba ispraviti u Budžetu, da ne stvaraju nedoumice, znači prilikom i samogglasanja o istom. Već je ranije kolega napomenuo da se za izvršenje sudskih presuda ove godine planira 400.000, ali smo na neki način odustali od nagodbi, samim tim ćemo kreirati i u ovoj godini još veće zatezne kamate po svim pravosnažnim presudama. Mislim da, ako smo se već odrekli koliko god je ovo na nekom...neću reći protiv zakona, al na nekoj ivici zakonitosti, možda je ovo trebalo obrnuti redoslijed pa da se za nagodbe onda izdvoji ovih 400.000 konvertibilnih maraka jer one će donijeti mnogo veće uštede nego samo izvršenje presuda. U Ministarstvu za prostorno uređenje, promet i komunikaciju zaštite okoline, zajedno sa svojim zavodima je već predviđeno neko povećanje od 7 zaposlenih. Kada se radi o Ministarstvu zdravstva, nažalost kapitalni transfer drugim nivoima vlasti za zdravstvo koje se zna da se uglavnom odnosi na Kantonalnu bolnicu Zenica i na druge zdravstvene ustanove, druge kant....druge bolnice, onaj je smanjen za 200.000 maraka što je opet kad imamo povećanje Budžeta, mislim da nije prihvatljivo i ja bih molila ministra zdravstva da na ovoj stavci kod Vlade insistira više. Također bi zamolila ministra zdravstva da na neki način iznađe, pogotovo kroz ovu stavku koja je značajno povećana i koja opet mislim da je greška u Budžetu, a to je tekući transfer neprofitnim organizacijama koji je utrošen u ovoj godini 336.000 maraka, planira se za narednu godinu 373.500 konvertibilnih maraka, a onda je ukupan Budžet iako nema drugih sredstava 423.500 konvertibilnih maraka, što pretpostavljam da je greška u samom materijalu, a u svakom slučaju onda to je veće povećanje nego što je ovdje i navedeno da se razmotri na neki način i da se osobe oboljele od pi-t-i-e-spija kvalitetnije tretiraju u zdravstvu pogotovo ću se sa smjelosti pozvati na Vašu profesiju, odnosno s obzirom koliko sam upoznata da ste neuropsihijatar, da ćete imati razumijevanja i adekvatno rješenje za ovu populaciju. Da smo materijal dobili u novembru, drugačije.....

Vezano generalno za transfere koji se odnose na transfere pojedincima i tekuće transfere neprofitnim organizacijama, ja na ovaj način apelujem da se ovi transferi kada je u pitanju Ured predsjedavajući radnog predsjedništva, Ured premijera, i eventualno, hajd' da kažemo ovako koga ne bi trebalo uzeti u obzir ovdje, znači, ovu stavku treba da ima Ministarstvo za rad, socijalnu politiku izbjeglice, treba da ima znači Ministarstvo za boračka pitanja, ali sva ostala ministarstva smatram da ovu stavku ne bi trebalo da imaju kao ni Ured premijera ni Ured predsjedavajuće, dopredsjednika jer ove stavke u principu su po mom mišljenju na neki način se kose sa samim principom javne potrošnje. Šta znači javna potrošnja, a imamo nešto što se zove transfer pojedincima? Zna se koje ministarstvo treba da se bavi sa ovom, s ovim, sa ovom vrstom transfera, tako daDemokratska fronta će djelovati čak i amandmanski na Nacrt Budžeta ukoliko se na Prijedlog Budžeta, ukoliko se ove stavke ne izbrišu, jer je po našem mišljenju to u suprotnosti sa osnovnim načelima javnih rashoda. Nešto što je javni rashod ne može biti dodijeljeno pojedincu ukoliko to, znači, ne spada u kategoriju koju treba da se bavi Ministarstvo za boračka pitanja, Ministarstvo za rad, socijalnu politiku raseljena lica-izbjeglice. Tako da ova sredstva koja su opredjeljena na ovaj način, po mom mišljenju trebamo, Vlada evo nek odluči, po kojim prioritetima, znači, da ih rasporedi, da li da Ministarstvo za privredu, da li za Ministarstvo za zdravstvo, da li u neke, znači, zaista prioritnije stvari nego što su transferi pogotovo u ovoj našoj predizbornoj godini gdje se zna otprilike na koji način se ta sredstva raspodjeljuju, ako već ne budete taj dio uradili, ne bude prihvaćen amandmanom, ima....ja se izvinjavam i drugi lijek za to da se onda moraju raspisati javni pozivi za ova sredstva, a ne dozvoliti diskreciono pravo bilo kojem pojedincu da ta sredstva na taj način raspoređuje. Toliko.

EDHEM FEJZIĆ

Hvala gospođo predsjedavajuća, na fonu ovog o kome je uvaženi zastupnik Senaid Begić naš prijatelj pričao, ja sam prošlu sjednicu pokrenuo inicijativu, nabavka aparata tzv., C luka koji će sigurno donijeti uštede Zeničko-dobojskom kantonu na stotine hiljada maraka i meni će biti drago ili da se ta inicijativa prihvati i da vi to ispoštujete i normalno Vlada, a ono o čemu ću ja govoriti neću pričati o transferima 205 na 06 to naši građani puno i ne razumiju. Ja želim da pričam o dobiti. Ja se mogu ne složiti se sa Jasminom Duvnjakom, svojim kolegom, ali ja ću vam reći gdje su pare i gdje se mogu overupe zakrpati što bi rekli je li matematičari. Zakon o koncesijama, molim vas, ministarstvo treba da završi Zakon o koncesijama Vlada na čelu sa premijerom sa svim našim zastupnicima u Federalnom parlamentu kako gornjeg, tako donjeg, to jeste Doma naroda i Parlamentarne skupštine Bosne i Hercegovine da se ne bi ko uvrijedio. Da se što hitnije Vlada usvoji Zakon o koncesijama i da izvade iz latice 250-300 projekata koje donose dobit. Ovo o čemu želim da pričam su Božije davanje ili majka priroda za Ateiste, to su znači voda. Mi ovdje smo razgovarali i u prethodnom periodu, da bi trebalo Ministarstvo privrede, Ministarstvo prostornog uređenja, Ministarstvo finansija i Ministarstvo za poljoprivredu, da zajedno sjednu i da pustimo napokon ko hoće uložiti novce da se prave brane normalo po svjetskim standardima ekološkim, zna se tamo kako ide i da olakšamo ljudima da ne čekaju 5-3 godine nego da to idemo ubrano, a što to govorim za uređenje riječnih korita da ne bi došlo do plavljenja i da ne bi ministre za promet i komunikacije odnosilo vam puteve. Sunčeva energija, Bog vam dao sunce, a mi nešto fantaziramo dajte da pustimo Zakon o panelima o

solarnoj energiji, dajte da to pustimo da ljudi koji žele da investiraju. Dajte da ova kantonalna Skupština, ne ni Vlada ni prva violina, ja ću ga stalo tako zvati, da ostanemo u sjećanjima ljudima da smo uradili koncesije, i da smo napokon pustili znači da se paneli znači solarna energija da je koristimo, a ja vam garantujem po našim planinama da možemo to da se uradi. Vjetar, vjetar je jako bitan na prostorima zato što, a svi ste očevidci da se mi nalazimo u ...svi gradovi skoro u Federaciji Bosne i Hercegovine se nalaze u kotlinama gdje doživljavamo aero zagađenje ali neću vas tušiti po vodom tog pitanja, ali svjetski stručnjaci su rekli ako bi se vetrenjače ugradile i da taj hajd' da ga nazovemo na loncu poklopac da pokušamo ga razbiti, a ujedno da mi dobijemo, pa hajde da pustimo da ljudi ulože sredstva da napravimo oko Zenice i normalno oko čitavog Kantona i pustimo ljudima koji žele da ulože sredstva da pravimo vetrenjače i da normalno imamo duplu korist da nam razbija taj, da digne taj poklopac da nam izađe para kada pravite grah i ovaj da nam izađu te čestice i napokon da imamo novca. Ja se nadam da ove tri stvari, ova ministarstva koja sam pomenuo da ćemo ove tri stvari uzeti sunce, vjetar i vodu i da ćemo tu ogromnu dobit, dobiti. Možda, mi nećemo tu dobit dobiti sada ali dajte da ostanemo ljudima da smo pokrenuli nešto i da napravimo nešto i da imamo dobitak. Radi vaše informacije samo pošto je vezano za Federaciju tj., Bosnu i Herceginu od uglja imamo negdje oko 80% - a 20% imamo samo od obnovljivih izvora. Tako da taj dio mi moramo malo puštati dole ne na ušrb rudara jer trebaće uvijek energije. Ja ću zamoliti i Vladu i ministra, znači kada smo razgovarali oko sigurnosti učenika, ja sam uputio ministarstvu ponovo da ovo o čemu je i predsjedavajuća govorila oko Ministarstva unutrašnjih poslova da ipak moramo sigurnost naših učenika da damo malo veći doprinos tj., novčani da se obezbijedi još ovaj, rad uposlenika Ministarstva unutrašnjih poslova na sigurnosti i nadam se da ću naići na razumijevanje, a direktor vjerovatno će biti taj koji može ovdje objasniti da nabavka aparata tzv., C luka, a normalno i gospodin ministar i Senaid Begić i normalno ministar zdravstva, da se to normalno na jednom godišnjem nivou, to su na stotine hiljada maraka gdje mi odvajamo u Tuzlu i Sarajevo, a smatram da mi imamo ovdje stručnjake koji mogu ugrađivati. Da vam samo pojednostavim su stentori koji se ugrađuju u naš organizam i da mi ostanemo živi. Hvala lijepo, prijatno.

PREDSJEDAVAJUĆA

Zahvaljujem, gospodin Skomorac.

RASIM SKOMORAC

Sve vas srdačno selamim i pozdravljam, ja ću zaista vrlo kratko, volio ako bi ako bi bilo moguće u okviru ovih transfera kada se radi o rashodima u Mministarstvu za prostorno uređenje promet i komunikaciju i zaštitu okoline kada se radi transferima i troškovima finansiranja projekata Vlade iz Fonda za zaštitu okoline da se pokuša naći, pokuša iznaći sredstva u okviru ovoga za rekonstrukciju krovova u Kantonalnoj bolnici Zenica, većina tih krovova su izrađeni od azbestnih ploča salonita što je dokazano kancerogeni efekat i zaista predstavljaju rizik za zdravlje pogotovo uposlenika koji svakodnevno borave u krugu bolnice, a zamjena takvih ploča zaista je neisplativa. Rekonstrukcija krovova je značajan projekat koji bi ove stvari riješio, a druga stvar takođe bi trebalo pokušati iznaći makar djelomična sredstva za izradu projekta rekonstrukcije termo energetske blokove, ako ne za

njegovu zamjenu i treća stvar u okviru Ministarstva zdravstva iz ovih transfera koji ovdje postoje pokušati svagdje po malo u manjiti i znači makar simbolična sredstva za početak projekta finansiranja vantjelesne oplodnje, što u nekim kantonima već postoji, što u Sarajevskom kantonu recimo kažu da imaju pravo na dva pokušaja vantjelesne oplodnje, a malo prije je neko spominjao ne znam više ko, da imamo problem sa bijelom kugom sa smanjenjem nataliteta, sa povećanjem steriliteta i mislim makar da započnemo nešto raditi na tome da bi to bilo značajno. Hvala lijepo.

PREDSJEDAVAJUĆA

Zahvaljujem gospodine Skomorac više nemamo prijavljenih diskutanata, zaključujem raspravu ministre Kajić ima li potrebe? Prije nego što krenemo na samo izglasavanje, imamo dva gosta koja će nam se obratiti po ovoj tački dnevnog reda to je gospodin Alija Redžić koji je predsjednik Saveza dobitnika najvećih ratnih priznanja Zeničko-dobojskog kantona, izvolite gospodine Redžić.

ALIJA REDŽIĆ

Cijenjena predsjedavajuća, dopredsjednici, cijenjeni zastupnici, što se tiče Prijedloga Budžeta odnosno Nacrta Budžeta, mi iz boračke populacije gledajući u Nacrt u suštini nismo nezadovoljni ali obzirom da će biti Prijedlog Budžeta mi ćemo ostati na rezervnim položajima, a to se zove Prijedlog Budžeta, hvala vam.

PREDSJEDAVAJUĆA

Zahvaljujem gospodine Redžić, gospodin Malkić Miralem predsjednik Saveza civilnih žrtava rata Zeničko-dobojskog kantona takođe će diskutovati po ovoj tački dnevnog reda, izvolite.

MIRALEM MALKIĆ

Poštovane dame i gospodo prije svog izlaganja ja bi se svim Bosancima i Hercegovcima Katoličke vjeroispovijesti zaželio sretan Božić Mery Cristmas. Ovo što je sada pred nama je Nacrt Budžeta Zeničko-dobojskog kantona za 2016. godinu lista želja i nadanja. Budžet koji mi punimo, svi građani poreski obveznici ovog Kantona koji vas plaćaju sve nas ovdje prisutne, na vama ostaje da ga uradite i pošteno rasporedite ova sredstva. Mi ne tražimo ništa više nego što smo dali u Budžet, prihodovna strana i što je regulisano zakonima za civilne žrtve rata. Gospodo zastupnici molim vas,.....ovaj u ponedjeljak ste govorili da želite dobru aradnju sa nevladinim organizacijama, ja mislim da ste govorili svi, evo vam prilike izvolite. Mnogo puta sa ove govornice mi smo govorili, ukazivali na probleme ove populacije, nek mi oprostite par zastupnika koji su postavljali pitanja i pomagali ovoj populaciji, i koliko mi se čini neke stvari su krenule na bolje i mislimo da će one sa ovom Vladom sa premijerom Galijaševićem i ministrom Nurđehanom, da će biti sve bolje i bolje. Rad ovog saveza je vidljiv u svim lokalnim zajednicama Zeničko-dobojskog kantona. Jer smo mi svoj imidž i kredibilitet gradili na onom što je zacrtano u zakonu, a prioritet pomoći civilnih žrtava rata i posebno onih koji su u stanju socijalne potrebe i zato smo prepoznatljiviji u našoj jedinoj domovini Bosni i Hercegovini i šire. Zato smo mi u Savezu civilnih žrtava rata, ozbiljno svatili ovaj Budžet, Nacrt Budžeta zapravo, i planiranje i finansiranje kroz sve faze

izrade i donošenja Budžeta Ze-do kantona, ja mislim da smo mi jedina nevladina organizacija, poslije će se na stotine prijaviti kada bude raspodjela sredstava, kada bude neprofitnim organizacijama, kada bude ovim i vi ćete to usvojiti izborna je godina i da ćete te pare što je predsjedavajuća rekla ja mislim da određene stvari treba ukinuti i dati onim koji rade i ona ministarstva koja trebaju za neprofitne organizacije ta novčana sredstva. Na osnovu zakona vezano za ovu populaciju, navrijeme smo vam dostavili nadležnom ministarstvu plan rada i finansijski plan. Molio bi nadležnog ministra da nam kaže kako su ostale nevladine organizacije i udruženja za pojedine stavke donijeli određena finansijska sredstva. Je li po vlastitoj želji, jel' po starom budžetu, jel' kako se kome sviđa? Znači pitanje da li udruženja koja ste vi planirali u Budžetu i ove neprofitne organizacije imaju svoj plan i plan finansiranja u Nacrtu ovog Budžeta?

Prvo što hoću da kažem, i posebno dug od 5 invalidnina ako ne možete riješiti za ovom govornicom već govorimo godinu dana, rekli ste u Budžetu je, zna da ova Vlada nastoji mjesec za mjesec da ide, a 5 ste dužni ko je dužan to mi nećemo da znamo, nama su dužni 5. Ministar je za ovom govornicom rekao, gospođa je Jupiće izlazila da su Zavidovićani tražili civilne žrtve rata i da je obećano koliko ja... izvinjavam se ako griješim, da će im biti plaćeno 5 invalidnina gdje ste ih stavili? Idemo sudskim putem, a rješavamo od 30. tražićemo i kamate, tražićemo i sve više nećemo šutiti nikome. Molim vas rad Saveza civilnih žrtava rata Zeničko-dobojskog kantona mi smo tražili minimalni iznos što je i gospođa Ugarak rekla 20.000, to je samo poticaj da možemo raditi i obezbjeđivati sredstva za ovu populaciju ponovo vam kažem mi ćemo Savez dobiti sigurno do milion ovaj sredstava od humanitarnih organizacija i drugih organizacija koje već pomažu ovu populaciju. I imamo već najava, znači to su nama samo inicirajuća sredstva za struju, vodu i sve ono što plaćamo. Molim vas obilježavanje Dana civilnih žrtava rata ova Skupština je donijela Odluku gdje su uvrštena ta sredstva? Možda negdje kroz neki kod, neki ekonomski kod, ja nisam ekomomista ali neke stvari razumijem dalje, troškovi liječenja invalida civilnih žrtava rata gdje su unešeni? Socijalno intervenirajuća pomoć civilnih žrtava rata koliko iznosi i u kojoj stavki je u Budžetu davalo se svakom mislim na osnovu nekog papira napisanog davala su se sredstva, ja to vrlo dobro znam. Stambeno zbrinjavanje i otklanjanje arhitektonskih barijera za civilne žrtve rata, još jednom vas sve upozoravam ovo je ratna kategorija i jedva čekam da ovaj novi zakon koji će vjerovatno biti usvojen i u Domu naroda iduće godine da stupi na snagu. Mi ovo tražimo, samo da vas napomenem, ništa ne tražimo što nije regulisano zakonom federalnim, izvolite pročitajte i kantonalnim, ništa drugo ne tražim i to u minimalnim iznosima, jer do sada niko nije za ovu kategoriju ni tražio, ni pitao, a Boga mi budite sigurni da ćemo sada insistirati i pratiti sve ovo. Jer mi dobro pratimo sve i pripremamo se kada treba nešto da kažemo. Molio bi ovdje ministra za rad i socijalnu politiku da pozove sva udruženja i sve one koji primaju sredstva iz Budžeta kod sebe u kancelariju i da neke stvari razlučimo, ko ima plan, ima ko nema, nema sredstava. I da se dogovorimo da vidimo koliko kome pripada po ovoj cifri. Molim vas transfer od milion KM, kojim korisnicima, to je kada je u pitanju socijalni transferi, kojoj kategoriji pripada kojim korisnicima i institucijama udruženjima neprofitnim organizacijama po kojem osnovu se dijeli? Molimo da se to tačno definiše. Nisu to mala sredstva, to je milion maraka. U stavci civilne žrtve rata vezano za redovno isplaćanje invalidnine koje isplaćuje Federacija BiH, stoji iznos 2335,68 KM u Nacrtu za 2016. godinu hvala Bogu oni nam redovno isplaćuju

70%, a oni su to regulisali. Pošto ću ja na kraju tražiti i od vas da Zakonom o izvršenju budžeta, a oni su to regulisali fino drugom tačkom i oni redovno isplaćuju tu nemamo problema. Gore u stavci stoji donacije, ja pitam koje su to donacije? Zar to nije transfer iz federalnog ministarstva kantonalnom ministarstvu, za ono što nas zakonom sljede 70% sredstava, to nisu donacije, jer mnogi se od nas pitaju i ja razumijem mnoge civilne žrtve rata i nemojte, budite sigurni čitaju vaše budžete i čitaju na našoj strani, to nisu donacije to je transfer sredstava iz federalnog ... iz Federacije transfer udruženjima 75, evo i to je pitaje mislim da je neko postavio pitanje što je uvećano? Ja mislim da je uvećano za to što je vjerovatno smo i mi tu uračunati i to ćemo viditi s ministrom zato što su udruženja prosljedila svoje planove i finansije. Transfer osobe sa invaliditetom stoji 690.000 KM planirano u Budžetu za 2016., ja u Budžetu nisam to vidio tu stavku. Ja je nisam primijetio evo recite mi ako lažem, ja se izvinjavam nisam je primijetio, a u Budžetu 2016.-tu planirano je 400.000 KM, ko ima pravo da ih koristi, na osnovu čega? Koliko sam ja proučio ovo je nova stavka u Budžetu i to je dobro, ako sam pogriješio ja se opet unaprijed izvinjavam, možda sam ja pogriješio... Zašto se ove stavke, sve u Ministarstvu za rad i socijalnu politiku, ne razvrstaju po korisnicima kako je to urađeno u Ministarstvu za ra.... Ministarstvu za boračka pitanja. Ovdje je samo općenito cifra ta ta, nema koliko sljede ovo, koliko sljede civilne žrtve, koliko ove, znači, sve je nabacano na kamaru i mi ne znamo šta je, da li je naš plan finansija i plan rada usvojen od ministarstva i da li su sredstva tu uračunata. I na kraju bi vas sve zamolio da Zakon o izvršenju budžeta, da se ne javljam više, Ze-Do kantona od 2016. godinu, reguliše Zakon u Federaciji BiH, znači prva stavka je koliko sam ja pročitao dugovi i sve ostalo, a druga stavka boračka populacija i socijalne kategorije, pa treći dalje ide, to sam i prošli puta iznio kad sam za ovom govornicom za budžetom da u zakonu to regulišete kako je regulisano da li možete, ne možete to je sada vaša stvar, da donesete ovdje odluku ali bi volio da to ide kako je u Federaciji, ja mislim da je moram na kraju da kažem da je Vlada na čelu sa premijerom Galijaševićem i ministrom Nurdehanom učinila dosta toga na rješavanju nekih problema i slabosti i ja im se na tome zahvaljujem i mislimo da će i ova kategorija, sa ovim svim našim ovaj primjedbama, nisu to primjedbe neke bitne ali se mogu uvrstiti u Budžet, da će uraditi na popularizaciji, odnosno da briše s margine skinemo i ovu populaciju i nemojte zaboraviti opet ponavljam 10.000 duša je, nećemo nikakvu gužvu, hoćemo kulturno i fino u duhu zakona da rješavamo ova pitanja ako bude „stani pani“, mi ćemo imamo zakon i sudske instance imamo sve rješavati putem suda sve ono što se nama duguje i što je zakonski regulisano, hvala lijepo.

PREDSJEDAVAJUĆA

Zahvaljujem gospodine, Malkić prelazimo na izjašnjavanje